

Aavernik illersuineq piniarnerlu pillugit Namminersorlutik Oqartussat nalunaarutaat

Piniarnek aallaaniarnerlu pillugit Inatsisartut inatsisaanni nr. 12, 29. oktober 1999-meersumi § 2, imm. 4, § 8, §§ 11-13, § 15, imm. 4 aamma §§ 17-21, kingullermik Inatsisartut inatsisaata allanngortinnera pillugu Inatsisartut inatsisaatigut nr. 1, 16. maj 2008-meersumi aamma Pinngortitamik illersuineq pillugu Inatsisartut inatsisaanni nr. 29, 18. december 2003-meersumi § 5, imm. 1, § 6, imm. 2, § 35, §§ 60-61 naapertorlugit aalajangersarneqarpoq:

Kapitali 1

Atuuffia

§ 1. Nalunaarummi uani nunami immamilu Kalaallit Nunaata oqartussaaffigisaani aarrup (*Odobenus rosmarus*) illersorneqarnera piniarnekarneralu pineqarpoq.

Imm. 2. Kalaallit Nunaata Avannaarsuani Tunumilu nunamik uumasuinillu eqqissisimatitsinissaq pillugu aammalu Qimusseriarsuarmi uumasunik eqqissisimatitsivimmut isernissamut immikkut aalajangersagaqarpoq. Aalajangersakkat taakkunani nalunaarutini marlunni aalajangersarneqarnikuupput.

Kapitali 2

Nassuiaatit

§ 2. Nalunaarummi matumani uku imatut paasineqassapput:

- 1) Piaqqat: Aarrup piarai 2 meterimik imaluunniit inorlugu angissusillit, imaluunniit tuugaavi kakkiviaanit nuisasut 10 cm-inik takissusillit imaluunniit naannerit, arnavissanik inersimasunik ingiaqateqartut.
- 2) Arnavissat inersimasut: Arnavissat tuugaavi kakkiviaanit nuisasut 15 cm-inik takissusillit imaluunniit takinerit.
- 3) Aqutsiveqarfiit ilanngussaq 2-mi aalajangersarneqarnikuupput.
- 4) Ileqqutoqqat atorlugit piniarnek: Aaffanniarneq angallat, qajaq imaluunniit qimusseq assartuutitut atorlugu, kiisalu piniutit assersuutigalugu unaq.
- 5) Pisiortorfik siulleg: Inuk inuussutissarsiutigalugu piniarnermut allagartalik aavermik pisaminit tunisassianik tunisaqartoq. Pineqarput tunisassiat nutaat, inunnut nerisassatut eqqarsaatigineqartut, sulisuliarineqanngitsut.
- 6) Sanalukkanik eqqumiitsuliat: Eqqumiitsuliaq aavermik tunisassiamit nammineq (illumini) suliaq nammineq angerlarsimaffimmi atugassiaq aammalu tuniniaqqinnissaa siunertaralugu suliaq.
- 7) Siloq: Aaveq immami, sikumi sissamiluunniit nassaarineqartoq toqungasoq.

Kapitali 3

Eqqissimatitsineq

§ 3. Aarrit nunami aalisarnikkullu imartami Kalaallit Nunaata oqartussaaffigisaani eqqissimatitaapput, nunami qassimaffii ilanngullugit, taamaattorli § 5 takuuk.

Imm. 2. Aarrit nunamiittut imaluunniit nunami qassimaffimmiittuniit 300 meterit iluanni aallaammik seqqorneq, ajoqusersuineq angalanerluunniit inerteqqutaavoq, taamaattoq imm. 3 takuuk.

Imm. 3. Naak imm. 2-mi aalajangersagaqarluartoq, aqqutit nalunaaqutsikkat aqqutigalugit angallammik angalasoqaqqusaavoq.

Imm. 4. Dronit aavernik filmiliornermut allatulluunniit malersuinermit atornissaat inerteqqutaapput, taamaattorli § 28 takuuk.

Imm. 5. Angallatit, angallatip angissusianut uppersaasaat malillugu 15 meterinik takissuseq tamakkerlugu (t.t.) takitigisut tassanngaluunniit anginerusunut, aarrit nunamiittut imaluunniit nunami qassimaffimmiittuniit 1000 meterit iluanni ajoqusersuineq angalanerluunniit inerteqqutaavoq.

Imm. 6. Aarrit nunamiittut imaluunniit nunami qassimaffimmiittut qulaallugit timmisartorneq minnerpaamik 1000 fod-imik (304,8 meter) qutsitsigisumik ingerlanneqassaaq.

§ 4. Piaqqat piaqqallu arnavissanik inersimasunik ilaqartut nunami aalisarnikkullu imartami Kalaallit Nunaata oqartussaaffigisaani eqqissimatitaapput, taamaattorli imm. 2 takuuk.

Imm. 2. Aqutsiveqarfik 1-imi 3-milu piaqqat arnavissanik ingiorteqartut arnavissallu inersimasut piniaqqusaapput, taamaattorli § 6 aamma § 28 takuuk. Piaqqat arnaminnik pisariaqartitsisut ilanngullugit toqunneqassapput, arnaa pisarineqarsimappat, pisallu immikkoortillugit marluusutut nalunaarutigineqassallutik.

Kapitali 4

Piniagassanut pisassiissutinik aalajangersaaneq

§ 5. Naalakkersuisut aavernik ukiumut ataatsimut imaluunniit ukiunut arlalinnut pisassiissutinik aaveqatigiikkuutaartumik aalajangersaasinnaapput. Pisassiissutinik aalajangersaaneq makkua eqqarsaatigalugit pissaaq:

- 1) nunat tamalaat akornanni isumaqatigissutit
- 2) ilisimatuussutsikkut siunnersuutit
- 3) piniartut atuisullu ilisimasaat, aamma
- 4) Kommunit aamma Piniarneq pillugu Siunnersuisoqatigiit ilaasortaanik tusarniaasimaneq.

Imm. 2. Pisassiissutit aarrinut tunngassutilinnik pissuteqartumik aarrillu amerlassusaat eqqarsaatigalugit aarrit aalajangersimasumik suaassusilinnut ukioqatigiinnullu piniarnissamullu piffissanut, sumiiffinnut aalajangersimasunut piniariaatsinullu aalajangersimasunut killilerneqarsinnaapput.

Imm. 3. Pisassiissutinik taakkunungalugu piumasaqaatinik aalajangersaaneq pillugu nalunaarut nittartakkami www.naalakkersuisut.gl-imi aamma tusagassiutitigut nalunaarutikkut tamanut saqqummiunneqassapput.

Kapitali 5

Piniakkat killeqarfii piffissallu piniarfiit aalajangersarnerat

§ 6. Piniakkat nunap immikkoortuinik killeqarfeqarput, ilanngussarlu 2 naapertorlugu nassuiarneqarlutik.

Imm. 2. Nunami sumiiffinnut killiliilluni uumasogatigiinnut pisassiissutit kommunimut, aqutsiveqarfimmut nunaqarfinnulluunniit aalajangersarneqarsinnaapput.

Imm. 3. Uumasogatigiit nunap immikkoortuini qanoq killeqarfeqarnerat pillugu ilisimatuussutsikkut ilisimasat nutaanerpaat tunngavigalugit piniarfissat aalajangersarneqassapput.

§ 7. Ilanngussaq 2 naapertorlugu killilersukkamik piniarfiit aqutsiveqarfillu nassuiakkat iluanni aaffanniartoqarsinnaavoq, ukioq pisassiiffusoq januarip 1-aniit decembarip 31-anut atuuppoq, ullut taaneqartut ilanngullugit.

Kapitali 6

Tusarniaaneq aamma piniagassanut pisassiissutinik agguaassineq

§ 8. Kommuninut pisassiissutinik, § 5, imm. 1 naapertorlugu aalajangersakkanik agguaassineq § 5, imm. 1, nr. 4 naapertorlugu tusarniaareernerup kingornatigut, agguaassineq Naalakkersuisumit sulianerineqassaaq.

Imm. 2. Piniagassatut pisassiissutit kommunikkaarlugit, aqutsiveqarfikkaarlugit, illoqarfikkaarlugit aamma nunaqarfikkaarlugit aalajangersaavigineqarsinnaapput.

Imm. 3. Aalisarnermut Piniarnermullu Naalakkersuisoqarfiup kommuninut pisassiissutinut atatillugu pisariaqartumik allaffissornikkut aqutsineq kommuninut isumagisassanngortissinnaavaa.

Imm. 4. Paasineqarpat kommunimi pineqartumi unioqqutitsilluni aaffattoqarsimasoq ukiumi pineqartumi ukiumiluunniit pisassiivimmi tullermi aqutsiveqarfimmut pisassiissutit Aalisarnermut Piniarnermullu Naalakkersuisoqarfiup ikilisissinnaavai. Piaraq pisarineqartoq aavermik inersimasumik ataatsimik amerlassusiliinertut atuuppoq.

Imm. 5. Arrinik nunap immikkoortuani aaveqatigiit ataatsip killeqarfiata iluani pisassiissutit atunngitsuukkat pisassiissutinut tamarmiusunut nunap immikkoortuani pineqartumi ukioq pisassiiffusup tullianut nuunneqarsinnaapput. Pisassiissutinik atorineqanngitsoortunik nuusseriaaseq tassaavoq ukiumiit ukiumut amerliartuutaanngitsumik nuussineq.

Kapitali 7

Piniarsinnaatitaasut, akuersissutinik tunniussineq agguaassinerlu

§ 9. Nalunaarummi matumani pineqartut naapertorlugit inuit akuersissummik tunineqarsimasut kisimik aaffanniarsinnaatitaapput. Tamanna aamma ataatsimoorluni piniarnermi atuuppoq.

Imm. 2. Akuersissut ataaseq ukiumi pisassiiviusumit ataatsimit aqutsiveqarfimmi akuersissutit tunniunneqarfiani, aavermik ataatsimik pisaqarnissamut periarfissiivoq. Piffissaq piniarfusoq akuersissummi takuneqarsinnaavoq.

Imm. 3. Akuersissut aallaaniarsinnaanermullu allagartaq atuuttoq piniarnermi aallaaniarnermilu nassarneqartassaaq nakkutilliinermullu atatillugu politiit, piniarnermik aalisarnermillu nakkutilliisut,

taakku ikiortaasa imaluunniit inuit tamatumunnga piginnaatitaasut piumasaqarnerisigut takutinneqartassalluni.

Imm. 4. Nunap immikkoortuini uumasogatigiit killeqarfiisut nassuiarneqarsimaneri akimorlugit piniarnissaq inerteqqutaavoq, ilanngussaq 2 takuuk.

Imm. 5. Piniarneq aallartitsinnagu kommunalbestyrelsi pisassiissutit aqutsiveqarfiit iluini illoqarfinnut nunaqarfinnullu tamanut agguaatissavai.

Imm. 6. Pisassiissutit aalajangerneqarnikut aqutsiveqarfinnut agguaanneqareerpata kommunalbestyrelsi Aalisarnermut Piniarnermullu Naalakkersuisoqarfinnut piaartumik ilisimatitsissaaq.

§ 10. Akuersissut inummut atiatigut taasamut taamaallaat atuuppoq allanullu tunniunneqarsinnaanani imaluunniit tuniniarneqassanani.

Imm. 2. Piniartut akuersissummik tunineqarsimasut akuersissummilli atuisinnaanngitsut imaluunniit atuerusunngitsut, piaarnerpaamik akuersissut atorneqanngitsoq kommunalbestyrelsimut utertissavaat.

§ 11. Aaffanniarsinnaanermut akuersissutit normulersukkat kommunimi qinnuteqartup inuit nalunaarsorsimaffianni angerlarsimaffeqarfigisaani kommunalbestyrelsimut qinnuteqartoqareerneratigut tunniunneqassapput.

Imm. 2. Akuersissutininik agguaassinermi peqataasinnaajumalluni piffissami qinnuteqaateqarfiusussami aamma piniarnerup nalaani qinnuteqartoq inuussutissarsiutigalugu piniarnermut allagartamik atuuttumik peqassaaq, piffissaq qinnuteqarfinmilu minnerpaamik 15-inik ukioqalereersimassalluni akuersissutit agguaanneqarnerani peqataanissamut.

Imm. 3. Akuersissummik tunniussinermiut peqatigitillugu kommunalbestyrelsip aaffassimanermut nalunaaruteqarnermi immersugassaq akuersissummik pissarsisumut tunniutissavaa. Aaffassimanermut nalunaaruteqarnermi immersuiffissaq nalunaarummi ilanngussaq 1-imi takuneqarsinnaavoq.

§ 12. Kommunalebestyrelsip aaffanniarsinnaanermut akuersissutit agguaassinnaasai aaffanniarsinnaanermut qinnuteqartoqarsinnaanermut naammassinnittut akuersissutiniit ikinneruppata, § 11, imm. 1 takuuk, kommunalebestyrelsip aalajangersinnaavaa akuersissutit illoqarfinnut/nunaqarfinnut tullerijarnermi imaluunniit pisortatigoortumik makitsinikkut imaluunniit piniartut akornanni aaqqissuussissalluni.

Imm. 2. Kommunalebestyrelsi piniartumut ataatsimut akuersissummik ataasiinnaanngitsumik tunniussisinnaavoq.

§ 13. Kommunalebestyrelsi pisaqarnissamut akuersissutit aaneqarnissaannut piffissamik killiliisinnaavoq.

Imm. 2. Akuersissutit piffissamik killiliilluni aalajangersakkap ingerlanerani aaneqarsimanngitsut, imm. 1 takuuk, pisortatigoortumik utaqqisut allattorsimaffiat kommunalebestyrelsimut pilersinneqartoq naapertorlugu aqutsiveqarfiup iluani agguaateqqinneqarsinnaapput.

Imm. 3. Agguaasseqqinnissamut piffissaliussaq kommunalebestyrelsimut nalunaarutigineqassaaq.

Imm. 4. Kommunimi aamma sumiiffinni aqutsiveqarfinni pineqartuni najukkani aalisartut piniartullu peqatigiiffinik kiisalu susassaqartut tamaasa najukkani aalisartut piniartullu peqatigiiffeqanngitsut ilanngullugit tusarniaareernerup kingornatigut agguaasseqqinneq ingerlanneqassaaq.

§ 14. Kommunalbestyrelsi pisassiissutigineqartut isumannaatsumik malinnaavigissavai piniarnerlu ingerlaannartumik unitsinneqassalluni tusagassiorfinnut nalunaaruteqarnikkut kommunimut imaluunniit aqutsiveqarfimmut pisassiissutit tamakkerneqarpata.

Imm. 2. Kommunalbestyrelsi kommunimut imaluunniit aqutsiveqarfimmut pisassiissutigineqartut tamakkerlugit pisarineqarpata Aalisarnermut Piniarnermullu Naalakkersuisoqarfik allakkatigut saaffigissavaa tusagassiorfinnut nalunaarut imm. 1-imi taaneqartup assilinera ilanngullugu.

Kapitali 8

Piniariaatsit atuinerlu

§ 15. Affanniarnermi taamaallaat qoorortuut minnerpaamik 30.06-istik (7,62x63 mm) sulloqqortussusillit atorneqaqqusaapput. Qoorortuut eqqarasuartartut nutsuinnartakkalluunniit aaffanniarnermi atoqqusaanngillat.

§ 16. Timmisartut helikopterit qamutillu motoorillit, taamatuttaaq qamuteralaat All-terrain vehicles (ATV-it) ilanngullugit, kiisalu angallatit, angallatip angissusianut uppersaasat malillugu 15 meterinik takissuseq tamakkerlugi (t.t.) takitigisut tassanngaluunniit anginerusut, aaffanniarnermut atatillugu imaluunniit piniarfissamut piniarfissamiillu angalanermut atorneqaqqusaanngillat.

§ 17. Qimusseriarsuarmi eqqissisimatitsivik 1-imi aaffanniarneq ileqqutoqqat atorlugit ingerlanneqassaaq, taassuma ataani qaannamik aaffanniarneq. Sumiiffik eqqissisimatitsivik 1-ip aamma eqqissisimatitsivik 2-p akornanniippoq.

§ 18. Aarrup pisarineqartup neqaa, amia atorneqarsinnaasortaalu allat tamaasa piniarfimmiit angerlaanneqassapput qimatulineqarlutilluunniit. Pisaqarfik qimatsinnagu sinnikut peerneqarnissaat sapinngisamik isumaginiarneqassaaq.

Kapitali 9

Akuerineqareernerup kingornatigut toqutsineq

§ 19. Aalisarnermut Piniarnermullu Naalakkersuisoqarfimmit akuerineqareernikkut aarrinik nappaatilimmik, annertuumik ikilernerqarsimasunik imaluunniit aarrit qassutit aalisarnermut atortunut allanullu nuiguussimasunik toqutsisoqarsinnaavoq.

Imm. 2. Aaffattamik akuerisaasumik pisaqareernerup kingunerisaanik paasineqarpat pisaq nappaammik imaluunniit assigisaanik pissuteqartumik inunnut nerisassatut naleqquttuunngitsoq, tamatuma kingunerisaanik Aalisarnermut Piniarnermullu Naalakkersuisoqarfiup pisap toqunneqartutut isigineqarnera akuerisinnaavaa. Akuersissut atorneqarsimappat taanna sulii atuutissaaq.

Imm. 3. Imm. 1 naapertorlugu aarrit toqunneqartut najukkami innuttaasunut agguanneqarsinnaapput, pisaq nerisassatut naleqquppat. Niaquata saarnga, kigutit (tuugaaq), baculum (usuata saarnga) Aalisarnermut Piniarnermullu Naalakkersuisoqarfiup pigisarai, toqunneqarneratalu kingornatigut kingusinnerpaamik ullut 14-it qaangiunneranni nassiunneqassallutik uunga Postboks 269, 3900 Nuuk.

Nassitsinermut aningaasartuutit Aalisarnermut Piniarnermullu Naalakkersuisoqarfimmit akilerneqassapput.

Kapitali 10

Pissaaneq aamma saniatigut pisisuukkat

§ 20. Aarrit pissatat saniatigullu pisisuukkat Aalisarnermut Piniarnermullu Naalakkersuisoqarfimmut nalunaarutigineqassapput. Aavernik pissaasoqartillugu saniatigulluunnit pisisoorisoqartillugu sapinngisamik piaarnerpaamik piniarnermik aalisarnermillu nakkutilliisoq tamanna pillugu attavigineqassaaq. Pissataq saniatigulluunniit pisisuugaq piniartup akuersissutaanut imaluunniit aqutsiveqarfimmi aaffattassanut sunniuteqassanngilaq.

Imm. 2. Aaveq saniatigut pisisuugaq sumiiffimmi innuttaasunut agguanneqarsinnaavoq, pisaq nerisassatut naleqquppat.

Imm. 3. Siloq siumorneqarpat – Aalisarnermut Piniarnermullu Naalakkersuisoqarfimmut nalunaarutigineqassaaq. Siloq iluaqutigineqarsinnaassappat sumiiffimmi qanoq passunneqarnissaa Naalakkersuisoqarfiup aalajangissavaa. Silormik naammattoorsinermi ilanngussaq 1-ikkut nalunaarutigineqarsinnaavoq, siloq iluaqutigineqarsinnaappat.

Imm. 4. Tunngaviusumik niaquata saarnga, kigutit (tuugaaq) aamma baculum Aalisarnermut Piniarnermullu Naalakkersuisoqarfiup pigisarai, Naalakkersuisoqarfiup aalajangissavaa pineqartoq qanoq passunneqassanersoq. Nassitsinermut atatillugu aningaasartuutaasinnaasut Aalisarnermut Piniarnermullu Naalakkersuisoqarfiup akilissavai.

Kapitali 11

Tunisinermi piumasaqaatit

§ 21. Inuussutissarsiutigalugu piniartunit atuuttumik inuussutissarsiutigalugu piniarnermut allagartallinnit pisaqarnissamullu akuersissummik naqissusikkamik peqartut kisimik neqinik, niaquata saarnganik, baculum aamma tuugaavinik pisiortorfittut siullertut tuniniaasinnaapput.

Imm. 2. Aaffattat tuniniaqqusaanngillat akuersissut naqissuserlugu kommunip allaffia nunaqarfimmiluunniit immikkoortortaq pisamik nalunaarsuereertinnagu, taamaattoarli imm. 3 takuuk.

Imm. 3. Kommunip allaffiata nunaqarfimmiluunniit immikkoortortap ammanerata avataatigut sulii naqissuserneqanngitsumik tuniniaaneq aallartissinnaavoq allaffik ammarniariartoq nalunaarsuisoqarpat.

Imm. 4. Pisanik aaffattalluunniit ilaanik tunisineq imaluunniit pisineq aatsaat pisinnaavoq akuersissummik piginnittup akuersissutip assilinerani uppernarsarlugu atsiorpagu. Taanna tuniniaasoqartillugu qinnuigineqarnikkut takutinneqarsinnaassaaq. Assilinerani takuneqarsinnaassaaq pisap kommunimi oqartussaasumit nalunaarsorneqarsimanera. Aarrup niaquata saarnganik, kigutaanik, baculum kiisalu saarnganik tuniseqqinnermi tunisinermiluunniit tunisinermut atatillugu akuersissutip assilinerata atsiorneqarsimasoq naqissuserneqarsimasorlu ilaatinneqassaaq. Taamaattoq sanalukkanik eqqumiitsulianut atatillugu tuniniaaqinneq akuerisaavoq.

Imm. 5. Unioqqutitsilluni aaffattaasimasup neqaa, baculum, saarnga, kigutaai pisataalu allat tunissutitut tigoqqusaanatillu pisiareqqusaanngillat.

Imm. 6. Aalisarnermut Piniarnermullu Naalakkersuisoqarfik aalajangiisnaavoq aaveq inatsisinik

unioqqutitsilluni pisarineqartoq tamakkerluni taassumaluunniit ilai pisortat suliffeqarfiutaannut imaluunniit nunaqqatigiinnut agguanneqassasut.

Kapitali 12

Nalunaaruteqarnek nakkutilliinerlu

§ 22. Aaffattat, saniatigut pisarisuukkat pissatallu sapinngisamik piaarnerpaamik kommunimut angerlarsimaffigisamut, illoqarfimmi nunaqarfimmiluunniit immikkoortortaqarfimmut nalunaarutigineqassapput.

Imm. 2. Nalunaaruteqarnek piniartumit pisaqartumit namminermi isumagineqassaaq. Ataatsimoorluni piniarnermi pisat nalunaarutigineqassapput taamaallaat akuersissummik piginnittumit.

Imm. 3. Nalunaaruteqarnermi immersugassaq nalunaarummi ilanngussaq 1 naapertorlugu pisanik nalunaaruteqartoqassaaq. Pisanut, pissatanut saniatigulluunniit pisarisuukkanut ataasiakkaanut tamanut immersuiffissaq ataaseq immersorneqassaaq. Akuersissut kommunimit naqissusikkap assilinera pisanik pissatanillu nalunaarutiginninnermi ilanngunneqassaaq, aaveq tuniniarneqassappat, § 21 imm. 1 takuuk. Immersuivissaq immersugaq akuersissutip naqissuserneqarneranut peqatigitillugu tunniunneqassaaq, taamaattorli § 20, imm. 1 takuuk.

Imm. 4. Pisaq nalunaaqutaqarsimappat normulimmik radiukkut imaluunniit qaammaataasakkut nassitsissuteqarpat, taanna aaffassimanermillu nalunaaruteqarnermi immersukkap assilinera ilanngullugu Pinngortitaleriffimmut nassiunneqassapput. Aaffassimanermik nalunaaruteqarnermi immersugassaq immersorneqartup original-ia Piniarnermut Aalisarnermullu Naalackersuisoqarfimmut nassiunneqassaaq, tassani normuqarnerani, radiukkut qaammataasakkulluunniit nassitsissut Pinngortitaleriffimmut nassiunneqarnera nalunaarutigineqassaaq.

Imm. 5. Kommunalbestyrelsip uani nalunaarummi ilanngussaq 1-imi immersuiffik kiisalu akuersissutip naqissusikkat assingi tiguneqarnerisa kinguinngua piaarnerpaamik Aalisarnermut Piniarnermullu Naalackersuisoqarfimmut nassitutissavai.

§ 23. Inuussutissarsiutigalugu piniarnermut allagartaq atuuttoq aamma akuersissut imaluunniit tunisisinnaanermut akuersissut politiit, piniarnermik aalisarnermillu nakkutilliisut imaluunniit tamatumunga piginnaatitaasut piumasaqarnerisigut takutinneqarsinnaassaaq.

Kapitali 13

Allatut ajornartumik imminullu illersorniarluni aaffanneq

§ 24. Pinerluttulerineq pillugu inatsimmi tamanna pillugu malittarisassat naapertorlugit imminut illersortariaqarluni iliortoqartariaqarluniluunniit aaffattoqarpat aaffattaq tamarmi Aalisarnermut Piniarnermullu Naalackersuisoqarfimmut pigissannngortinneqassaaq. Naalackersuisoqarfiup pisaq qanoq pineqassanersoq aalajangissavaa. Aalisarnermut Piniarnermullu Naalackersuisoqarfiup sumiiffimmi neqip il.il. agguannissaata isumaginissaa aallartisarsinnaavaa.

Imm. 2. Allatut ajornartumik imminullu illersorniarluni aaffattup tamanna ingerlaannaq Aalisarnermut Piniarnermullu Naalackersuisoqarfimmut nalunaarutigissavaa.

Kapitali 14

Kommunimi ileqqoreqqusat

§ 25. Kommunalbestyrelse kommunip ileqqoreqqusaatigut nalunaarummi § 7, § 11, imm. 1 aamma imm. 3, § 12, § 13, imm. 1-3, § 14, § 15, imm. 1, § 16, § 18, § 21, imm. 1-5-imi aalajangersakkanit sakkortunerusunik aalajangersaasinnaapput kiisalu kommunip iluani sumiiffinni aalajangersimasuni piniarnerup qanoq ingerlanneqarnissaanut najoqqutassiorsinnaallutik.

Imm. 2. Kommunit ileqqoreqqusaat Aalisarnermut Piniarnermullu Naalakkersuisumit akuerineqartassapput.

Kapitali 15

Nalunaaqutsiineq annissinerlu

§ 26. Aavernik nalunaaqutsiineq suliallu allat aavernik ilisimatuussutsikkut misissuinernut attuumassuteqartunut atatillugu nikinnaveersaartitsineq taamaallaat Pinngortitaleriffimmit ingerlanneqarsinnaapput.

Imm. 2. Immikkoortoq 1 naapertorlugu siunertaanngitsumik toqutsineq Aalisarnermut Piniarnermullu Naalakkersuisoqarfimmut nalunaarutigineqassapput. Naalakkersuisoqarfiup siunertaanngitsumik toqutaq qanoq pineqassanersoq aalajangersaavigissavaa.

§ 27. Aarrit, nukallut ilanngullugit, Naalakkersuisut akuersissuteqarsimatinnagit uumasuutigeqquneqanngillat imaluunniit Kalaallit Nunaanniit anniseqqusaanngillat.

Kapitali 16

Immikkut akuersissuteqarneq piniarnermullu piumasaqaatit sukumiinerusut

§ 28. Aalisarnermut Piniarnermullu Naalakkersuisoqarfik ilisimatusarnermut imaluunniit Kalaallit Nunaata piniagassatigut pisuussutaasa nalunaarsorneqarnerannut atatillugu nalunaarummi matumani aalajangersakkanik atortinneqannginnissaannik immikkut akuersissuteqarsinnaavoq.

§ 29. Aalisarnermut Piniarnermullu Naalakkersuisoqarfik aaffanniarsinnaanermut atatillugu piumasaqaatinik aalajangersaasinnaavoq, ilisimatuussutsikkut misissuinernut atugassanik aarrup pisinneqarsimasup amimernganik, neqimernganik, saanimernganik imaluunniit kigutimernganik tunniussisarnissamut. Ilisimatuussutsikkut misissugassaq pisap paasissutissartai aammalu pisanut nalunaarutip assilineru ilanngullugit kommunep allaffianut tunniunneqassaaq aamma Nunatsinni Pinngortitaleriffiup plastik-imik puussarititaanut tunniunneqarsimasumut asiunaveersaammik imerpalasortalimmut ikineqassapput.

Imm. 2. Kommunip allaffiata misissugassat pisanillu nalunaaruteqarnermi immersugassaq immersorsimasup assilineru tiguneqareernerisa kinguinnguutigut Pinngortitaleriffik, Postboks 570, 3900 Nuuumut nassiutissavai. Nassiussinermut aningaasartuutit Pinngortitaleriffiup akilissavai.

Kapitali 17

Pineqaatissiissutit

§ 30. § 3-4, § 7, § 9, imm. 1-3. § 10, §§ 15-21, § 22, imm. 1-4, §§ 23-24, §§ 26-27, § 29, imm. 1-imik unioqqutitsisoqartillugu akiligassiinermik pineqaatissiisoqarsinnaavoq aamma arsaarinnittoqartarnissaq pillugu pinerluttulerinermi inatsimmi aalajangersakkat atuupput.

Imm. 2. Nalunaarut malillugu kommunimi ileqqoreqqusat unioqqutinneqartillugit pinerluttulerinermi inatsit malillugu kommunimi ileqqoreqqusani akiliisitsisoqartarnissaa arsaarinnittoqartarnissaalu aalajangersarneqarsinnaapput.

Imm. 3. Aarrup ilaasa arsaarinnissutigineqartut atorineqarnissaat Aalisarnermut Piniarnermullu Naalakkersuisoqarfimmit aalajangerneqartassaaq.

Imm. 4. Inatsisitigulluunniit pisussaatitaasuttaaq imm. 1 malittarissanik ilaatinneqarput, pinerluttulerinermi inatsimmi aalajangersakkat naapertorlugit.

Imm. 5. Nalunaarut manna malillugu akiliisitsinermik pineqaatissiissutit Nunap Karsianut nakkartinneqassapput.

Kapitali 18

Atuutilersitsinermut ikaarsaariarnermullu aalajangersakkat

§ 31. Nalunaarut ulloq 7. oktobari 2022 atuutilerpoq.

Imm. 2. Peqatigitillugu Namminersornerullutik Oqartussat aavernik illersuineq piniarnerlu pillugit nalunaarutaat nr. 20, 27. oktober 2006-imeersoq atorunnaarpoq. Taamaakkaluartoq kommunip ileqqoreqqusai nalunaarut malillugu atulersinneqartut allanngortinneqarnissamik atorunnaarsinneqarnissamilluunniit tungaannut atuutiinnarallassapput.

Namminersorlutik Oqartussat, ulloq 7. oktobari 2022

Karl Tobiassen

Aalisarnermut Piniarnermullu Naalakkersuisoq

/ Jørgen Isak Olsen

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut